

太上洞淵神呪經卷之十

殺鬼品

地十

道言吾在玄都山為一切魔王說大驅除經時有三天子求說上元中元下元經復有十國真人亦求說三昧無量太素經復有十方仙人亦求說道化黃庭內外二景玉經復有四方運集閣浮有三萬真人俱來聽經說經末竟各各下坐曰世間之人不解道法令疫鬼殺之乃兵暴虐人民苦惱門門有死無有三洞不自後度願請此法師流演天下唯願天身垂心道化太上曰善哉善哉乃遣三萬真人持經化行天下復有真人尼和將三萬九千人持經亦布化天下中國之人悉各受之有急疾病官事之家悉為轉之一日一夜三時行道官事者解疾病者瘥疫鬼盤旋不去者一一斬之有怨也

道言此真人等與國中之人有大因緣故遣之令轉經耳今受三洞經者皆悉无身有福緣應上仙方得值此師也自今以去若有奉佩此經之人我亦天人護之終不有惡也

道言壬午年大災起動人民慙慙六夷不安疫鬼殺人可作神符依法施安宅內三家五家十家百家共於水上一日大會作一土壇縱廣八尺高六尺東向三十六拜禮五帝及上章書奏告天人必記子之志心矣

道言辛巳年六月壬午年九月癸未年七月必有疫鬼八萬來下殺人鬼名烏塗倫那倫那身長七丈七千萬為摩復有大赤鳥形如車輪飛來食人人奉有三洞之經經行人問者此疫鳥悉死矣道士為信之焉

道言大劫垂至國主貪殘不恤下民民皆困窮使役無道人民苦厄哭聲盈路死亡蓋野男女失時不好道法出門奔亡六夷紛紜大賊縱橫以氣相伐父子相疑天遣疫鬼誅殺此罪人此人罪重值此大水水來不久不自覺知法師道士於今有化人之家三天大王一切仙人十方玉女悉來助之令道士強健所救之家天人護之令疾病官事速得解了鬼炁消散病時得瘥若有鬼不去者請為斬之不聽怨也

道言十方主者曰此來世人多惡信道者稀天下不化今壬午年遣疫鬼八千萬眾行七十種病殺人人知者家家當建是齋於大水上拜謁五帝西北向拜及作大符置大門上懸之疫鬼不敢近人也自非有符錄之家不聽此符者疫鬼害人此符有八千萬大力士守之也



懸之大門

道言至甲戌壬午之年有八千九百赤面鬼鬼名明真各將三萬九千小鬼鬼悉提赤棒殺惡人惡人多故故不信有水災不信有道法當入三塗五厄之中太上玄見心念一切乃為度之矣

道言壬午之年為一切人作齋轉無量三昧經者有疫鬼來者必不得前也道士有受三洞布化之人天帝來助之終不落惡道之中矣

道言癸未年至甲申有三十九萬黑鳥之鬼

來朔中川放毒入於人家令人水病病不可治之若有身佩符籙十家五家水上作治舍一間供養三寶晨夕香燈朝謝禮拜并謁五帝一日二日七日作會天人必記予之名名入玉曆耳

道言大災毒至水來不久愚人不知悠悠過日天帝錄女十二萬人仍來化之人不知之矣若年已之年有值此女子化者于等即得仙度若有人疾病官事口舌法師道士但為化之錄女等亦不助子終不令主人有厄矣
道言至癸未之年道炁日盛三洞流布四海九州信樂道士心正國王受持洒掃偏闕闕有經臺旦夕然燈燒香禮拜慶鬼奔走病者自瘥官事自解三天大兵擁護法師法師行處鬼賊斥去千里天人下助道士矣

道言甲申之年大龍上天九萬為群人有見者大水必來近也道士入山可全今身世人多惡淫洩貪財殺生無度免心不移不信大道不作仙行見人受經反更互笑此人入無盡地獄獄中有一日七死七生乃復令活如

此四十二劫劫運乃出得為人六情不具癡聾瘡痂加復癩癩眼瞎唇缺耳聾癩背折偃老患鹿面摩脚無有手足人不喜見見者吐逆此之罪人本行所來矣

道言善人生處聰明過人皆因先身習學中來世有形殘之人先身有大罪故有此身此身復不受化者無有見善也道士但化之天人必記予之志若不度者違前人元元丹誠非大士度人之法矣

道言至壬午年已有三萬白頭鬼名千轉身長三丈而黑頭白萬萬為群下三萬九千種病病殺惡人人有不信道法誹謗道士評論經書言是非言經無神不知大道淵深廣遠若天叵及如海難量乃以愚人之心道說妙典輕慢道士言世無神心懷兩端壞亂真心此之罪人罪合萬死死入倒地獄獄中倒立三十劫劫盡乃出為六畜復出世矣道言世人多愚是以天令萬神惡惡殺之所以殺之者由以誹謗道士殺害良人故也今有不信大道不敬三寶不肯受經者天兵誅

之耳今有三千六十種病殺人有肉鬼三萬石鬼十萬木鬼二萬水鬼三千六十萬土鬼六十萬蟲鬼十六萬六千悉能殺人也所以能殺者鬼悉附此物之上殺人入水水死入山石死斫樹木死食肉悉死起土土死入

草蟲傷此悉非法之惡也道士自今以去勤化萬姓愚人男女今悉奉道鬼不近之矣若不信者大驅之日恐鬼兵來誅子耳

道言壬午之年有帝主六夷悉奉大道三洞流布入山之人處處有之汝等受法奉經不必大小不必老少無論男女唯有心奉之者天人移壽終不橫死也自然得入仙品矣道言自今以去若有道士男女之官勤化萬民遊行國界救療百病者汝等魔王天人子息小鬼王等悉共佐助道士治病不令生人病厄枉其算壽殺鬼安人耳
道言自今以去當令一切鬼王隨逐道士安人療治萬病病無不應若有不瘥斬之萬段吾今遣五方神將九天大兵三千九萬人一合來下助道士所治之家令百病官事一時

了了若不從者鬼王先坐一一如太上金口所勅不待違科急急如律令

道言世人不信道又不受經生於世俗自招罪本見人作善笑人行道不敬三寶天人誅之奄然而去悔亦何及吾今遣十方力士三

千萬人一合助此道士所行之處安人斷邪若有欺辱道士罵詈拍打圖謀偷盜者一一收此人等魂魄付所在地獄治之令自知罪

負以明天憲矣鬼王者用吾此言語為此道士殺戮此惡人若不殺者天人不喜大道不神也一切魔王曰唯然一一奉命今為殺如此之人等

道言自今以去道士悉行化他國邊遊之處道士求覓病人一一為作齋轉經行道吾當遣十方大兵八十萬人助子治之勅一切大

魔王令天下無惡風雨不淋浪人鬼和悅百姓歡忻國王信道凡庶受經七日入山進仙若不爾者吾不名大道也不復化人矣

道言大法師治病但口章不必紙點治之又轉經行道無不瘥也若病人大重者亦可併

上口章仰謝往愆解釋羅網拔罪替伐矣道士三洞之師但入靜室啓得同志道士行九

一之炁亦行三五之炁諸天力士神王金剛無不降也此天真及天人天女之術天人靈妃一切天人來下助子之心官事疾病無不瘥也自今以去道士行道之家大魔王小鬼

王等悉逐佐助救之令瘥若不瘥者小王與大魔王慰真等頭破作八十分矣一一如太上口勅斬之不想矣

道言道士悉奉三洞之人不得與黃赤之道士俱遊也奉經道士三洞法師當入山遠避濁世若在人間男女黃赤道士自別立治舍若欲同之取求良日庚申甲子丁卯己卯八日十二日二十二日九日一日十八日合日也

道言一切魔王自今道士往處所行救人之地當令生人所苦自瘥官事解了人有惡事一切過之百福歸身安人殺鬼若疾病得瘥昇入大道若不助道士令生人死者汝等各斬之萬碎終不恕之一一奉行如太上口勅

急急如律令

道言今有八千黑身鬼長六寸託鳥而飛來在水中或因風雨來著人身上着即死復有三萬九千沙地胡鬼長三寸其色赤白因水泛漲便著於人復有八十萬大濕鬼鬼

名天頭其主亦好暴亂各領三萬鬼賊入人宅中令人失火大不可救如此之鬼大水之運國主酷治便可殺人有受經道士心務山林不取生官如此之人及黃赤之男女亦乃不殺矣

道言自今方有大鬼鬼名朋周十萬大鬼名李子史兒桃姜壬午年各領十二萬人來殺惡人唯真道士不取犯耳自今為始至甲戌之年以去萬萬鬼兵來殺惡人惡輩若有道士轉經治救者天人助之鬼王哀汝自來護之矣

道言自今以去壬午之年至壬辰年子丑之歲大鬼殺入中有男女活者十中不有三四惡人多矣故天誅之刀兵水死奈何奈何唯道士受經之者天人來迎大劫將盡必來速

矣鬼亦競起人當疫死若有人得三洞法師為之行道者大鬼魔王一切護助令治病即瘳為攝天下橫鬼內外之群入地千尺主人若復不瘳死亡狼藉官事不了田蠶不收仕宦不遷其不如意者吏兵先坐大魔王及小鬼子等斬之千段不怒之矣一一告下如太上金口所勅之急急如律令

通言今有八萬九千黑面大鬼鬼名赤鬚身長七丈四十九萬為群每詐稱黃帝怒人家親將一切無藉之鬼世間魍魎男女之群領羅丁勒掌南陽葉公石母太子雲中李于敖三天無着之鬼千萬此億來入人家取人小口老嫗男女令天下人疾病死亡處處有之門門皆死鬼兵屯集住人隣陌捉人六畜鳥獸作其凶恠令人遭官口舌刑徒囚獄狂濫田蠶不收隨事皆凶自今以去汝等魔王小鬼一切鬼王急為道士佐治生人令官事解了疾病者瘳若不從命汝等魔王各斬之萬段矣一一如太上口勅律令

太上洞淵神呪經卷之十

太上洞淵神呪經卷之十一 制一

三昧王召鬼神呪品

元始天尊以上皇二年建辰之月八日月中時於元陽上宮為大羅諸天大梵天帝四極高真九天元王三天真皇說洞玄靈寶大有至真自然智慧淨誠妙經法事既畢乃更命名三炁天君五老上帝九宮真仙四方無極三十六天帝飛天神王九地土皇三界官屬神霄大魔前後圍繞飛行太空迴駕來降苑利之天碧海之崖方諸宮內洞淵池上坐五色龍蓮花之座將說法要救度三界五道一切蒼生放身威光普照十方一百八十海諸龍宮殿鄴都陽谷水會之府風澤九地三十六地土皇官殿仙真大聖領籍之府及三十六洞天各有日月星辰官屬人民六畜馬獸蟲魚自謂安樂其無神道凡俗之類夫妻男女老幼尊卑自相紹休種種名色陰陽五行吉凶苦樂貧賤富貴皆如此上亦無有異也復有學道求仙之者栖身山谷證道成聖若不習六通六覺不名道士亦謂他士無如

是事乃至上方無極世界凡聖所居苦樂果報請下九幽泉曲五岳洞天令諸大衆悉皆親見善惡生死報對往還塗炭流曳八門自生自死甚可哀傷大衆之內天人之中地仙之類或不知見飛行五岳修習尸解服藥鍊身不慕靈寶大智慧源未達宿命真寂無為自然性者心不自固妄惑所馳六情所蕩或於所著四見飄忽天上地下隨惡輕重受其報對無有自勉痛毒非一皆生怖畏五神悲惶莫測所從各欲四散而不能去自相顧謂我等今日值遇聖尊何緣乃見如此惡對身心驚怖不能自安唯願天尊垂哀救護解說元始復命本心於是象中東上九天飛天神王名曰三昧威德智慧相好具足力攝諸魔天神龍鬼大明呪術善權方便隨機利益從座而起領諸真人蔚明羅王及三十六天小王拘婁王等同整衣冠俱起作禮叩頭自博長跪稽首上啓道君我等積善深厚奉遺大聖翼從仙真高玄大士沐恩過分忝在王位各統諸天喜懼交集令觀慈光更開大宥有我

太上洞淵神呪經卷之十